



4. Tschanteda da la suprastanza cumünela in marculli, ils 23.3.2016 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan, Liun Quadri

Absaints:

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 6.100 Exposiziun publica proget via chantunela punt Vallember-Tschessa Granda, piglier pusiziun
4. 9.420 Largiadèr Gian Fadri, dumanda per pudair surpiglier chamanna dals pesters e lavuraints da god Vaüglia Suot, God da la Föglia
5. 0.400 Temas regard il svilup regiunel, discussiun cun la nouva sviluppedra regiunela, Regula Frei
6. 3.400 OK Swiss O Week 2016, dumanda per pudair fer adöver dal pascul in Briatscha scu parkegi pels curriduors da la cuorsa d'orientaziun dals 17 lügl 2016 sün nos territori cumünel
7. 0.400 Center da fliamaint Promulins, decisiun da fer part e da der giò üna declaraziun d'intenziun
8. 7.100 Schlargiamaint dals indrizs per l'alluntanamaint da l'ova persa e pel provedimaint da l'ova potabla Susauna, pre-contrats per drets da passagi e decisiun d'inoltrer la dumanda da fabrica BAB
9. 0.209 OEE, declaraziun d'intenziun da collier las raits cumünelas (S-chanf, Cinuos-chel, Chapella e Susauna) d'electricited vi da la rait electrica da l'OEE
10. 0.130 Participaziun a la "Engiadina San Murezzan Turissem SA" (ESTM SA) auncha da funder ed autorisaziun da der ün mandat da prestaziun a la ESTM SA auncha da funder a partir dals 1. schner 2018
11. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 24.02.2016 vain approvu unanimamaing.

23 0.210 Annunzchas da fabrica

Barblan Curdin pitschens müdamaints parcella nr. 721
da fabrica interns

**24 0.211 Dumanda da fabrica
Angelini SA, dumanda preliminar per nouva betuniera**

La firma Angelini SA ho inoltro üna dumanda preliminar per üna nouva betuniera sün parcella nr. 798 in Serlas. Zieva animada discussiun decida la suprastanza, cha l'otezza dals silos nu paun surpasser l'otezza maximela da 18 meters, chi'd es prescrita illa ledscha da fabrica. La construcziun accessoric po gnir resguardada scu surpassamaint tecnic. La suprastanza decida cun 4 cunter 0 vuschs da comunicher in quel sen al patrun da fabrica e scha las otezzas vegnan tgnidas aint, po la dumanda da fabrica effectiva gnir concessa. Liun Quadri s'ho absanto per quista tractanda.

**25 0.211 Dumanda da fabrica
Dazzi Ambrosi, nouv parkegi**

Ambrosi Dazzi ho inoltro üna dumanda per eriger ün nouv parkegi sün parcella nr. 72 in Somvih. Siand cha l'acconsentimaint dals chantunais es avaint maun, decida la suprastanza unanimamaing da conceder il permiss giavüscho.

**26 0.211 Dumanda da fabrica
Frehner Peter, differentas refacziuns externas**

La suprastanza piglia cugnuschentscha da la dumanda da Peter Frehner per isoler e renover il tet existent, rimplazzer las fnestras, scurnir il serragl da chauns, refer la drenascha vers saira e fer ün scul per l'ova da meteor, munter ün implaunt da solar vers mezdi scu eir üna nouva cligna sün parcella nr. 641 in Davous Chesas. Zieva cuorta discussiun decida la suprastanza unanimamaing da conceder il permiss giavüscho.

**27 6.100 Via chantunela
Exposiziun publica proget via chantunela punt Vallember-
Tschessa Granda, piglier pusizien**

Actuel es publicho il proget da la correctura da la via chantunela punt Vallember fin Tschessa Granda fin tar l'entreda da la Flab. La suprastanza fo üna lectüra da las actas preschaintas e decida da piglier seguintamaing pusizien:

Lingias cumünelas da chanelisaziun ed ova potabla (940-840)

Il chantun ho planiso, d'uzer las vascas e las lingias cumünelas in vicinanza da la via chantunela in Plaun dals Senchs. La societad naziunela da la rait Swissgrid SA planisescha ils prossems ans, da metter suot terra la lingia libra existenta da 60-kv traunter Pradella e La Punt. Las lingias gnissan missas sün la via champestra davous la deponia, inua chi passa la loipa vers Chapella. Las lingias cumünelas da chanelisaziun ed ova potabla in Plaun dals Senchs passan pel mumaint tres la zona da deponia previsa, quellas s'ho bod u tard da spuster in ün'otra direcziun. Uschè as pudess spuster quellas insembel cun la Swissgrid e'l chantun nu vess da fer üngüns müdamaints. Ils cuosts cha'l chantun spargness cun quista varianta dessan gnir indemnissos a nossa vschinauncha.

Spustamaint da la senda Chapella Ospiz fin Ravuntschè (1240-1040)

Gia pü lösch vaiva la suprastanza l'intenziun da spuster la senda traunter l'Ospiz Chapella e la via chi vo sü Ravuntschè, siand cha quella passa tres terrains privats e d'inviern nun es pussibel da fer liber quella. L'ideja es, da passer nouv cun la senda lung la via chantunela. Per quel motiv dess il chantun eriger ün banket d'arduond 2 meters larghezza per chi's po eriger la senda.

Suotpassagi da la loipa d'inviern, senda vers Prasüras e per lascher our muaglia da sted (1640-1620)

La zona per sports d'inviern (loipa) passa actuel sur la via chantunela. Siand cha la via vain eir in quel lö pü largia, es da ponderer our da motivs da sgürezza ün suotpassagi. Quel pudess eir gnir nüzzagio da sted per la colliaziun da senda sgüra da Chapella fin Prasüras scu eir per lascher our la muaglia sül pascul. Il lö füss ideel per fer il suotpassagi.

Senda piazza da camping fin tal nouv suotpassagi (1800-1640)

Our da motivs cha la colliaziun vers Prasüras / Chapella füss eir d'avantag pels giasts dal camping, dess il chantun eriger eir in quel lö ün banket d'arduond 2 meters larghezza.

28 9.420 Stabels da la faculted finanzia Largiadèr Gian Fadri, dumanda per pudair ütiliser chamanna dals pesters Vaüglia Suot, God da la Föglia

Gian Fadri Largiadèr ho inoltro üna dumanda per pudair nüzzer la chamanna dals pesters in Vaüglia Suot, God da la Föglia. La chamanna sto pel mumaint per granda part, ma schi's spetta aunch'ün temp, schi giaro quella bainbod in muschna. Zieva cuorta discussiun decida la suprastanza unanimamaing da pussibiliter a Gian Fadri Largiadèr d'ütiliser la chamanna cumünela cun las medemmas cundiziuns regard l'ütilisaziun da las chamannas cumünelas.

29 0.400 Progets regiunels Temas regard il svilup regiunel, discussiun cun la nouva svilupedra regiunela, Regula Frei

Per quista tractanda es preschainta duonna Regula Frei, la nouva svilupedra regiunela. Ella spiega in fuorma d'üna preschantaziun sia lavur actuela e la lavur futura. Zieva chi sun gnidas dedas tuot las spiegaziuns, ingrazch'il president a la nouva svilupedra regiunela per las infurmaziuns dedas.

30 3.400 Sport OK Swiss O Week 2016, dumanda per pudair fer adöver dal pascul in Briatscha scu parkegi pels curriduors da la cuorsa d'orientaziun dals 17 lügl 2016 sün nos territori cumünel

La suprastanza piglia cugnuschentscha da la dumanda dal comitè d'organisaziun „Swiss O Week 2016“, chi organisescha düraunt ün'eivna cuorsas d'orientaziun in tuot l'Engiadin'Ota, da pudair nüzzer il pascul in Briatscha scu parkegi pels curriduors. Ils respunsabels da la societad da pasculs ed alps sun prunts, da pasculer u sger il pascul sün quel termin. Zieva cuorta discussiun decida la suprastanza cun 4 cunter 1 vusch da conceder il permiss giavüscho.

31 0.400 Progets regiunels Center da fliamaint Promulins, decisiun da fer part e da der giò üna declaraziun d'intenziun

Zieva la decisiun negativa regard üna chesa da fliamaint cumünai vla per tuot l'Engiadin'Ota in favrer 2014 e l'avis da las vschinaunchas Puntraschigna, San Murezzan fin Segl da realiser ün proget per üna chesa da fliamaint a San Murezzan, staun las vschinaunchas davent da Schlarigna fin S-chanf fer impissamaints a la chüra futura. Tenor ün stüdi da realisaziun da la firma Fanzun da l'utuon 2015 po gnir l'implaunt existent sano ed ingrandieu. Impü es avaint maun üna declaraziun da las vschinaunchas sura, cha las vschinaunchas suot da l'Engiadin'Ota paun nüzzer e gestiuner inavaint la chesa da chüra cun la pretaisa, cha quella po gnir nüzzedada be per quel scopo. Las vschinaunchas da Schlarigna fin S-chanf sun interessadas da mantegner il lö Promulins

scu center da fliamaint. Zieva animeda discussiun decida la suprastanza unanimamaing da der giò la declaraziun d'intenziun per la prùma fasa pel stüdi da proget e finanziaziun.

32 7.100 Chanalisaziun/sarinera
Schlargiamaint dals indrizs per l'allontanamaint da l'ova persa e
pel provedimaint da l'ova potabla Susauna, pre-contrats per
drets da passagi e decisiun fuorma per inoltrer la dumanda da
fabrica BAB

In connex cul proget regard il schlargiamaint dals indrizs per l'allontanamaint da l'ova persa e pel provedimaint da l'ova potabla in Susauna es da stipuler culs differents proprietaris da terrain contrats per drets da passagi chi vegnan registros i'l cudesch fundiari. Üsito es però, cha'ls contrats effectivs vegnan pür stipulos zieva cha las lavuors sun glivredas. Cun que vegnan uossa stipulos preliminar pre-contrats e la suprastanza piglia cugnuschentscha da quels. Zieva üna lectüra e zieva cuorta discussiun decida la suprastanza da suottametter quels als differents proprietaris da terrain per cuntrasegner. L'indemnisaziun per meter lingia vain previs cun fr. 7.00, l'indemnisaziun per vasca cun fr. 100.00. La suprastanza decida cun 4 cunter 0 vuschs da suottametter ils pre-contrats scu preschanto. Duri Campell s'ho absanto per quista decisiun. Impü decida la suprastanza cun 3 cunter 2 vuschs d'inoltrer la dumanda BAB be per la part da las lavuors cumünelas, sainza las lavuors dals privats. Impü decida la suprastanza cun 4 cunter 1 vusch, d'eriger ün nouv idrant in vicinanza da la nouva direcziun da las lingias vers Susauna.

Siand cha la tschanteda es gnida mneda fin ad ün tard urari, propuona il president da continuer cun las tractandas 9 e 10 illa prosma tschanteda. Tuot ils preschaints sun perinclets cun quella proposta.

33 9.999 Varia

Il president orientescha, cha Denise Hinden ho desdit la piazza süls 30.09.2016 scu collavuratura da l'infurmaziun turistica e scu secretaria da l'uffizi forestel e resgia.

Inavaunt orientescha'l, cha la cuorsa d'inline ho lö eir quist an, e que in dumengia, ils 11.09.2016. Ils permiss per serrer la via chantunela sun avaunt maun.

Il president orientescha, cha l'uffizi chantunel per natüra ed ambiaint ho reagieu sün la charta regard il schlargiamaint da l'infrastructura in Susauna. Cha cun que cha la vschinauncha ho planiso da collier las fracziuns Susauna e Nandet vi da l'ara, vain abolieu il scumand da fabricher.

A las 23.10 vain la tschanteda alveda.

In buna fè

L'actuar:
D. Schwenninger